

OHR i OSCE ocjenjuju da su neophodne reforme entitetskih budzeta

Visoki predstavnik, Wolfgang Petritsch, i šef misije OSCE-a, Robert Beecroft, nakon što su doznali rezultate revizija entitetskih budžeta za 2000. godinu, provedenih u posljednja tri mjeseca, izražavaju svoju duboku zabrinutost u pogledu statusa javnih finansijskih sredstava i postojećih mehanizama kontrole sredstava poreskih obveznika u BiH. Transparentna uprava finansijskih sredstava predstavlja evropsku normu. Međutim, izvještaji jasno ukazuju na to da način na koji vlade u BiH djeluju ne samo da dovodi do gubitka sredstava i da predstavlja osnovni izvor korupcije, nego on osporava i ekonomski razvoj BiH, te njeno uključivanje u evropske integracije.

U februaru 2001. godine Visoki predstavnik je imenovao specijalnog revizora sa zadatkom da izvrši finansijsku reviziju budžeta Federacije BiH. Tim revizora ispred OSCE-a je proveo sličnu reviziju budžeta u RS-u, u saradnji sa RS Zavodom za glavnu reviziju. Obje revizije su izvršene u toku tromjesečnog perioda.

Rezultati obje revizije pokazuju da postojeći sistemi interne kontrole ne odgovaraju ciljevima zaštite javnih sredstava BiH od gubitaka kroz korupciju i nekompetentnost. Iako nekompetentnost. Iako kontrole na nivou ministarstva formalno postoje, ipak im nedostaje sustina. Odluke o uplati sredstava se uglavnom saopstavaju na nejasan način, dok se nekim drugim odlukama krše propisi; mehanizmi za praćenje namjenske potrošnje sredstava često su nedovoljni ili nepostojeći; prateća dokumentacija nije kompletna, dok su metode izbora prodavaca neodgovarajuće. Evidentno je da se kontrole mogu

vrlo lako izbjeći.

Provedene revizije ukazuju na urgentnu potrebu za reformom sistema interne kontrole uz daljnje revizije koje će provoditi relevantne domaće agencije. Stoga, OHR i OSCE pozivaju vlade oba entiteta i vlade u svim kantonima da postignu napredak u slijedecim oblastima reforme:

- da odmah usvoje mjere u cilju poboljšanja uvjeta kontrole u općim računovodstvenim praksama koje postoje u svim ministarstvima. Takve interne promjene će omogućiti vladama da smanje gubitak sredstava i pojavu korupcije;
- da se pruži znatno veća podrška funkciji glavnog revizora, osiguravajući pritom da nadležni zavodi mogu djelovati na istinski nezavisan način. Za početak, vlade moraju u potpunosti finansirati zavode koji su zaduženi za provođenje glavnih revizija. Drugo, nadgledanje rada tih zavoda bi trebalo da vrše sami parlamenti, a ne vlade (koje inače podliježu detaljnoj kontroli koju provode zavodi za glavnu reviziju).